

Galak pembantu rumah tempatan: Maznah

Pinda Akta Pekerjaan 1955 galak amah tempatan

NURKHAIRINI JUMARI

KUALA LUMPUR – Akta Pekerjaan 1955 akan dipinda tidak lama lagi bagi membolehkan pembantu rumah tempatan memperoleh insentif dan syarat minimum pekerjaan sebagaimana profesion pekerjaan lain.

Timbalan Menteri Sumber Manusia, Senator Datuk Maznah Mazlan berkata, usaha itu dilakukan untuk menarik minat warga tempatan menceburi bidang pembantu rumah sekali

gus mengurangkan masalah kemasukan warga asing.

“Dengan penggabulan Akta tersebut, pembantu rumah tempatan akan memperoleh insentif dan kelebihan sebagai pekerja seperti cuti tahunan, gaji minuman, Socso dan sebagainya.

“Kementerian sedang menjalankan perbincangan dengan pihak yang terlibat untuk menghalusi aspek

terma-terma pekerjaan, syarat dan insentif-insentif lain untuk tujuan tersebut,” katanya kepada Dewan Rakyat di sini, semalam.

Dalam pada itu, beliau berkata, tiada keperluan mendesak untuk menubuhkan institut latihan untuk melatih pembantu rumah tempatan.

Menurutnya, hasil daripada kajian yang dijalankan kementerian bagi menilai vialibiliti cadangan mewujudkan institusi latihan tersebut

mendapati kebanyakan rakyat tempatan kurang berminat untuk menjadikan pekerjaan pembantu rumah sebagai satu profesion.

“70 peratus daripada majikan yang dikaji hanya sanggup menawarkan gaji di antara RM300 hingga RM500 sebulan untuk pembantu rumah.

“Kadar gaji ini tidak mungkin akan menarik mi-



● MAZNAH MAZLAN

nat rakyat tempatan untuk menceburi profesional ini,” katanya pada Sidang Dewan Rakyat di sini, semalam.

Beliau berkata demikian menjawab soalan lisan Matulidi Jusoh (BN-Dungun) ingin tahu tahap pencapaian institusi pembantu rumah bagi mengatasi penggantungan terhadap pembantu rumah warga asing sekaligus mengurangkan warga asing ke Malaysia.

Beliau berkata, secara keseluruhan, kajian mendapati tidak ada keperluan mendesak untuk menubuh-



Suara dari Dewan Rakyat

kan institusi latihan untuk melatih pembantu rumah.

Menurutnya, disebabkan begitu banyak masalah melibatkan pembantu rumah pada kebelakangan ini, kementerian akan mengkaji semula cadangan ini dengan lebih mendalam.

“Beberapa siri perbincangan dengan pihak yang berkaitan seperti Pertubuhan Majikan, pekerja, badan-badan bukan kerajaan dan agensi kerajaan yang berkenaan akan dijalankan untuk mendapatkan cadangan dan pandangan bagi pelaksanaannya,” katanya.

Seramai 251,355 orang pembantu rumah warga asing daripada 14 buah negara sumber telah bekerja sebagai pembantu rumah di negara ini. Daripada jumlah itu, 51.7 peratus dari Indonesia.